



CONCELLO DE LAXE (A CORUÑA)

Avda. Cesáreo Pondal, núm. 26 – CP 15117 – Teléfono: 981 706 903

Fax: 981 728 025 – E-mail: correo@laxe.es

CERTIFICADO

Begoña Carrasco García, secretaria-interventora do Concello de Laxe (A Coruña)

CERTIFICO

Que o Pleno da Corporación deste concello, en sesión Ordinaria realizada o xoves 28 de maio de 2026, ACORDOU o seguinte:

“9.3. Moción de don Fernando del Moral Regaldíe en contra do proxecto “Planta de biogás Laracha” en Soandres (A Laracha). Expte. núm. 2026/G006/000013.

Dase conta da seguinte moción:

“MOCIÓN DO CONCELLO DE LAXE EN CONTRA DO PROXECTO “PLANTA DE BIOGÁS LARACHA” EN SOANDRES (A LARACHA)

que presenta o concelleiro non adscrito de Podemos no concello de Laxe, de acordo e ao amparo do previsto no Regulamento de Organización, Funcionamento e Réxime Xurídico das Entidades Locais, para a súa inclusión no pleno ordinario do 28 de maio de 2026.

EXPOSICIÓN DE MOTIVOS

PRIMEIRO.- Que o Concello de Laxe ten coñecemento do proxecto de construción dunha planta de biogás na parroquia de Soandres, no termo municipal de A Laracha, promovido pola empresa BIOENERGÍA A CORUÑA, S.L., que pretende valorizar ata 63.500 toneladas anuais de residuos orgánicos, incluíndo 6.500 toneladas anuais de residuos SANDACH de categoría 3 (residuos de matadoiro), cun funcionamento previsto de 24 horas diarias durante os 365 días do ano.

SEGUNDO.- Que o río Anllóns, na ribeira do cal se sitúa a parcela proxectada (a escasos 95 metros do leito), discorre polos termos municipais de A Laracha, Carballo, Coristanco, Ponteceso e desemboca na ría de Corme e Laxe, no litoral do municipio de Laxe a través da súa desembocadura no termo municipal de Ponteceso. A calidade das augas do río Anllóns afecta directamente á calidade das augas da ría de Corme e Laxe, zona de alto valor ecolóxico, pesqueiro e turístico para o noso municipio.

TERCEIRO.- Que o proxecto contempla o vertido ao río Anllóns de ata 58.592 metros cúbicos anuais de augas residuais industriais depuradas e pluviais, o que supón un caudal diario de 112,88 metros cúbicos diarios no escenario máis desfavorable. O punto de vertido sitúase no termo municipal de A Laracha, augas arriba da desembocadura na ría de Corme e Laxe.

CUARTO.- Que o Estudo de Impacto Ambiental presentado polo promotor presenta deficiencias graves que afectan á avaliación dos impactos sobre o medio hídrico, e que poñen en risco a calidade das augas do río Anllóns e da ría de Corme e Laxe:

- Deficiencias na avaliación da calidade da auga e do vertido ao río Anllóns

O Estudo de Impacto Ambiental e o proxecto técnico de tratamento de augas presentan as seguintes deficiencias constitutivas de vicios substanciais:

- Efecto acumulativo con vertido de Cárnicas Vista Alegre ignorado. O propio EsIA reconece (Anexo VIII, páxina 49) que a só 40 metros augas abaixo do punto de vertido proposto se atopa o vertido industrial de Cárnicas Vista Alegre, S.L., cun caudal autorizado de 20.475 metros cúbicos anuais. Porén, a análise de efectos acumulativos do EsIA (páxinas 336-338) ignora esta sinerxia e só analiza industrias a máis de 7 quilómetros de distancia. A suma de ambos vertidos nun tramo de río de apenas 40 metros constitúe un impacto sinérxico que non foi avaliado.

- Cabal de estiaxe subestimado. O cabal mínimo de referencia calcúlase en 0,035 metros cúbicos por segundo (período de retorno de 20 anos). En meses de verán, o río pode presentar cabais moi inferiores, reducindo drasticamente a capacidade de dilución dos vertidos e aumentando o risco de afección á calidade da auga augas abaixo, incluída a ría de Corme e Laxe.

- Eficacia das membranas de ósmose inversa comprometida. A natureza graxa e proteica dos lodos de conserveira (que representan máis do 80% da carga tratada) e dos residuos SANDACH provoca unha incrustación (fouling) constante das membranas, o que pode resultar en vertidos con concentracións de amoníaco e demanda química de osíxeno incompatibles co estado ecolóxico do río.

- Risco de desbordamento do separador de hidrocarburos. A escorrentía das plataformas de manobra de camións (ata 20 camións diarios) pode transportar hidrocarburos e restos de puríns a un separador



CONCELLO DE LAXE (A CORUÑA)

Avda. Cesáreo Pondal, núm. 26 – CP 15117 – Teléfono: 981 706 903

Fax: 981 728 025 – E-mail: correo@laxe.es

que podería verse desbordado en episodios de chuva intensa (cabal de avenda para $T=50$ anos de 0,198 metros cúbicos por segundo), provocando o lavado de contaminantes directamente ao leito.

- Consecuencias xurídicas destas deficiencias (vicio substancial) As deficiencias sinaladas vulneran:

- O artigo 4 da Directiva 2000/60/CE (Directiva Marco da Auga) , que establece a obriga de previr o deterioro do estado das masas de auga e de protexelas e melloralas.

- A normativa do Plan Hidrolóxico de Galicia-Costa 2021-2027, que establece como obxectivo para a masa de auga ES-014-NR-149-000-01-00 (treito do río Anllóns) o mantemento do "estado bo ou mellor" e o principio de "non deterioro".

- O artigo 6 da Directiva 92/43/CEE (Directiva Hábitats) , pois o río Anllóns actúa como vector ecolóxico e hidrolóxico directo cara á ZEC Costa da Morte (Rede Natura 2000), e a doutrina do Tribunal de Xustiza da Unión Europea (Sentenza C-127/02, caso Waddenzee) esixe unha "avaliación adecuada" das repercusións do proxecto sempre que exista unha probabilidade de que afecte de forma apreciable ao lugar, independentemente da distancia.

o O artigo 35 da Lei 21/2013, de avaliación ambiental, que esixe unha identificación, descrición e avaliación adecuada de todos os efectos significativos do proxecto, incluídos os efectos acumulativos e sinérxicos.

A ausencia de avaliación do efecto acumulativo dos vertidos, a falta de análise específica en condicións de estiaxe e a omisión da conexión hidrolóxica coa Rede Natura 2000 constitúen defectos esenciais do Estudo de Impacto Ambiental que impiden garantir que o proxecto non producirá un deterioro do medio hídrico do río Anllóns e, polo tanto, da ría de Corme e Laxe.

QUINTO.- Que o río Anllóns alberga especies de fauna catalogadas como ameazadas, cuxa conservación pode verse comprometida polo vertido:

Especie Estatuto de Protección Risco identificado

Anguilla anguilla (Airoa) Perigo Crítico (UICN) Alteración da calidade química da auga por vertidos

Chioglossa lusitanica (Píntega rabilonga) Vulnerable (CEE/CGEA) Sensibilidade extrema á contaminación

Lutra lutra (Lontra) Réxime de Protección Especial Degradación da cadea trófica fluvial Rana iberica (Ra patilonga) Vulnerable (CGEA) Impacto por variacións no pH e osixenación da auga

Estas especies atópanse augas arriba do punto de vertido, pero calquera alteración da calidade da auga ou do ecosistema fluvial afecta a toda a conca, incluídos os hábitats da ría de Corme e Laxe.

SEXTO.- Que o propio Estudo de Impacto Ambiental contén contradicións insalvables en relación coa afección ao río Anllóns. Por un lado, afirma que a ra patilonga (Vulnerable) non se verá afectada polo proxecto, pero, por outro lado, o proxecto inclúe un punto de vertido de ata 58.592 metros cúbicos anuais de augas depuradas directamente no río Anllóns. Esta contradición vicia de nulidade a avaliación de impacto.

SÉTIMO.- Que o municipio de Laxe basea gran parte da súa economía no turismo e na actividade pesqueira e marisqueira da ría de Corme e Laxe. A percepción dun risco de contaminación das augas da ría, aínda que sexa potencial, pode causar un dano reputacional irreparable ao destino turístico, coa conseguinte perda de visitantes e ingresos para o municipio. A desvalorización dos recursos naturais e paisaxísticos de Laxe é un impacto real e tanxible que debe ser tido en conta.

OITAVO.- Que a propia Deputación da Coruña se posicionou institucionalmente en contra do proxecto, e os Concellos de A Laracha e Culleredo manifestaron o seu rexeitamento explícito. A Plataforma veciñal "Stop Biogás" mantén unha oposición social activa ao proxecto.

PARTE DISPOSITIVA

Por todo o exposto, o Pleno do Concello de Laxe, no exercicio das súas competencias en materia de defensa do territorio, protección do medio ambiente e promoción do desenvolvemento sostible,

ACORDOS

PRIMEIRO.- Manifestar o REXEITAMENTO FORMAL E UNÁNIME do Concello de Laxe ao proxecto "Planta de Biogás Laracha" promovido por BIOENERGÍA A CORUÑA, S.L. na parroquia de Soandres (A Laracha), polos seguintes motivos:

1. O vertido de ata 58.592 metros cúbicos anuais de augas residuais industriais depuradas e pluviais ao río Anllóns supón unha ameaza para a calidade das augas da ría de Corme e Laxe, co conseguinte risco para a actividade pesqueira, marisqueira e turística do municipio.

2. O Estudo de Impacto Ambiental presenta deficiencias graves na avaliación dos impactos acumulativos e sinérxicos sobre o medio hídrico, ao ignorar o vertido de Cárnicas Vista Alegre, S.L. situado a só 40 metros augas abaixo do punto de vertido proposto.



CONCELLO DE LAXE (A CORUÑA)

Avda. Cesáreo Pondal, núm. 26 – CP 15117 – Teléfono: 981 706 903

Fax: 981 728 025 – E-mail: correo@laxe.es

3. O Estudo de Impacto Ambiental non avalía adecuadamente as condicións de estiaxe do río Anllóns, período no que a capacidade de dilución se reduce drasticamente, incrementando o risco de afección á calidade das augas abaixo.

4. Existe conexión hidrolóxica directa entre o punto de vertido no río Anllóns e a ZEC Costa da Morte (Rede Natura 2000) a través do propio leito do río e da ría de Corme e Laxe, polo que a avaliación de afeccións á Rede Natura 2000 é insuficiente e incompleta.

SEGUNDO.- Instar a Dirección Xeral de Calidade Ambiental e Sostibilidade da Xunta de Galicia a que:

– Denegue a Autorización Ambiental Integrada e emita Declaración de Impacto Ambiental Desfavorable para o proxecto "Planta de Biogás Laracha".
– Con carácter subsidiario, en caso de que non se denegue, imponha as seguintes condicións mínimas e inescusables:

o Estudo da capacidade de carga do río Anllóns que inclúa o vertido acumulado con Cárnicas Vista Alegre, S.L. e avalíe especificamente os períodos de estiaxe.

– Prohibición ou severa limitación do vertido durante os meses de xuño a setembro (período de estiaxe).

– Depósito de seguridade de digestato líquido con capacidade mínima de 15 días (2.094 metros cúbicos) para garantir cero vertidos en caso de fallo do EDARI.

– Canalización do foco do biofiltro para facer medibles as súas emisións, cun Plan de Control de Emisións para NH₃ e H₂S con medicións periódicas semestrais.

– Avaliación adecuada das repercusións do proxecto sobre a Rede Natura 2000, conforme á doutrina do Tribunal de Xustiza da Unión Europea (Sentenza C-127/02, caso Waddenzee), tendo en conta a conexión hidrolóxica a través do río Anllóns e a ría.

TERCEIRO.- Solicitar a comparecencia dos representantes da Consellería de Medio Ambiente e Cambio Climático ante este Pleno para informar sobre o estado de tramitación do expediente e sobre as medidas que se adoptarán para garantir a protección da calidade das augas do río Anllóns e da ría de Corme e Laxe.

CUARTO.- Remitir o presente acordo á Dirección Xeral de Calidade Ambiental e Sostibilidade da Xunta de Galicia, á Consellería de Medio Ambiente e Cambio Climático, á Deputación da Coruña, así como aos Concellos de A Laracha, Carballo, Coristanco e Ponteceso.

QUINTO.- Publicar o presente acordo no taboleiro de anuncios do Concello de Laxe e na súa sede electrónica, e darlle a máxima difusión para coñecemento da cidadanía.

SEXTO.- Facultar a Alcaldía para cantas actuacións sexan necesarias para a defensa deste acordo e para o exercicio das accións administrativas e, de ser o caso, xudiciais que procedan contra o proxecto."

Don Xosé Manuel Pose Lema, concelleiro do BNG explica que en todos os concellos de Bergantiños o BNG está presentando unha moción sobre este tema e que en Laxe non a presentaron porque non lles dou tempo antes da convocatoria do Pleno e mostra o seu apoio á plataforma, facendo referencia á similitude coa súa moción.

O sr. alcalde aclara que a convocatoria do pleno se adiantou para que se tivese mais tempo de revisar os pregos do SAF e di que como non pode ser doutro xeito van votar a favor da moción.

Non habendo mais intervencións, sométese a votación, obtendo o seguinte resultado:

VOTOS A FAVOR: 11 [(6 do PP (don Francisco Charlín Oróns, dona Raquel Lema Allo, dona Sandra Mouzo Pose, don Daniel Mata Martínez, don Eulogio Constantino Castiñeira e dona Begoña Gegúndez Allo), 3 do BNG (don Xosé Manuel Pose Lema, dona María Cristina Vázquez del Prisco e dona Isabel María Toja Toja), 1 do concelleiro do Grupo Mixto, (don Francisco José Vidal Castro) representante do PsdeG PSOE e 1 do concelleiro non adscrito (don Fernando del Moral Regaldíe)]

VOTOS EN CONTRA: 0

ABSTENCIÓNS: 0

Queda por tanto aceptada, a moción proposta:

PRIMEIRO.- Manifestar o REXEITAMENTO FORMAL E UNÁNIME do Concello de Laxe ao proxecto "Planta de Biogás Laracha" promovido por BIOENERGÍA A CORUÑA, S.L. na parroquia de Soandres (A



CONCELLO DE LAXE (A CORUÑA)

Avda. Cesáreo Pondal, núm. 26 – CP 15117 – Teléfono: 981 706 903

Fax: 981 728 025 – E-mail: correo@laxe.es

Laracha), polos seguintes motivos:

1. O vertido de ata 58.592 metros cúbicos anuais de augas residuais industriais depuradas e pluviais ao río Anllóns supón unha ameaza para a calidade das augas da ría de Corme e Laxe, co conseguinte risco para a actividade pesqueira, marisqueira e turística do municipio.
2. O Estudo de Impacto Ambiental presenta deficiencias graves na avaliación dos impactos acumulativos e sinérxicos sobre o medio hídrico, ao ignorar o vertido de Cárnicas Vista Alegre, S.L. situado a só 40 metros augas abaixo do punto de vertido proposto.
3. O Estudo de Impacto Ambiental non avalía adecuadamente as condicións de estiaxe do río Anllóns, período no que a capacidade de dilución se reduce drasticamente, incrementando o risco de afección á calidade das augas abaixo.
4. Existe conexión hidrolóxica directa entre o punto de vertido no río Anllóns e a ZEC Costa da Morte (Rede Natura 2000) a través do propio leito do río e da ría de Corme e Laxe, polo que a avaliación de afeccións á Rede Natura 2000 é insuficiente e incompleta.

SEGUNDO.- Instar a Dirección Xeral de Calidade Ambiental e Sostibilidade da Xunta de Galicia a que:

- Denegue a Autorización Ambiental Integrada e emita Declaración de Impacto Ambiental Desfavorable para o proxecto "Planta de Biogás Laracha".
- Con carácter subsidiario, en caso de que non se denegue, impoña as seguintes condicións mínimas e inescusables:

o Estudo da capacidade de carga do río Anllóns que inclúa o vertido acumulado con Cárnicas Vista Alegre, S.L. e avalíe especificamente os períodos de estiaxe.

- Prohibición ou severa limitación do vertido durante os meses de xuño a setembro (período de estiaxe).
- Depósito de seguridade de digestato líquido con capacidade mínima de 15 días (2.094 metros cúbicos) para garantir cero vertidos en caso de fallo do EDARi.
- Canalización do foco do biofiltro para facer medibles as súas emisións, cun Plan de Control de Emisións para NH₃ e H₂S con medicións periódicas semestrais.
- Avaliación adecuada das repercusións do proxecto sobre a Rede Natura 2000, conforme á doutrina do Tribunal de Xustiza da Unión Europea (Sentenza C-127/02, caso Waddenzee), tendo en conta a conexión hidrolóxica a través do río Anllóns e a ría.

TERCEIRO.- Solicitar a comparecencia dos representantes da Consellería de Medio Ambiente e Cambio Climático ante este Pleno para informar sobre o estado de tramitación do expediente e sobre as medidas que se adoptarán para garantir a protección da calidade das augas do río Anllóns e da ría de Corme e Laxe.

CUARTO.- Remitir o presente acordo á Dirección Xeral de Calidade Ambiental e Sostibilidade da Xunta de Galicia, á Consellería de Medio Ambiente e Cambio Climático, á Deputación da Coruña, así como aos Concellos de A Laracha, Carballo, Coristanco e Ponteceso.

QUINTO.- Publicar o presente acordo no taboleiro de anuncios do Concello de Laxe e na súa sede electrónica, e darlle a máxima difusión para coñecemento da cidadanía.

SEXTO.- Facultar a Alcaldía para cantas actuacións sexan necesarias para a defensa deste acordo e para o exercicio das accións administrativas e, de ser o caso, xudiciais que procedan contra o proxecto."

E para que conste expido o presente certificado en cumprimento do artigo 206 do Real Decreto 2568/86 do 28 de novembro, do Regulamento de Organización, Funcionamento e Réximen Xurídico das Entidades Locais, para os efectos correspondentes e a reserva da aprobación da acta correspondente, expido o presente certificado, co visto e praxe do alcalde, *Laxe (documento asinado dixitalmente)*.



CONCELLO DE LAXE (A CORUÑA)

Avda. Cesáreo Pondal, núm. 26 – CP 15117 – Teléfono: 981 706 903

Fax: 981 728 025 – E-mail: correo@laxe.es